

欽定全唐文

欽定全唐文卷九百六十七目錄

闕名 八

請命代官留任候除奏

請以知東西兩推奏

請貴糴便農奏

論郭仲文不合襲封奏

請吏部選人頒行長榜奏

請接濟諸州閒散宗室奏

請於五經字樣後附九經字樣奏

請紀錄時政奏

論韋籌進書史解表奏

請准受代官赴闕奏

請常參官拜掃給公券奏

請量留料錢奏

許常參等官有疾得乘擔子奏

請更瀍水名奏

禁園戶盜賣私茶奏

禁商人盜販私茶奏

請桃代宗奏

請停散試官攝州縣事奏

請定祀九宮儀注奏

定宰相兩省官拜賀朝儀奏

請禁伐桑奏

請改河陽等縣爲望州縣奏

請以罰公主封物宣付史館奏

請禁止奸欺奏

請更定應舉保人例奏

毀佛像奏

勒令僧人還俗奏

請修繕東都太廟奏

論韋宏質奏

請詳定廟制升祔奏

請定祝文稱號奏

增諸州刺史俸料奏

欽定全唐文卷九百六十七

闕名八

請命代官留任候除奏

開成元年二月  
中書門下

諸州刺史諸府少尹次赤令諸州府五品已上官并常參  
官等在任之例約是三載命代之後遽卽到京人數既多  
闕員常少稍經時月則訴飢寒起今後請據舊章刺史及  
五品已上官在外應受替去任非有徵召未得到京宜委  
所在州府每兩月一度申中書門下其初狀仍具前任政  
績受代月日中書門下准前置具員量才除授其家在上

都因自歸止者京兆府申奏

請改知東西兩推奏

開成元年  
御史臺

舊以第一第二殿中御史知東西推竊以故事三院御史皆初領繁劇後卽漸輕近以新入監察兩人監倉監庫殿中旣無倉庫兼俸空負推獄憂勤卽與臺中從劇入輕頓乖舊例今請殿中第三人第四人分知兩推希同漸殺之

文

請貴糴便農奏

開成元年  
一度支

每年供諸司并畿內諸鎮軍糧等計粟麥一百六十餘萬

石約以錢九十六萬六千餘貫糴之畿內百姓每年納兩  
稅見錢五十萬貫約以粟麥二百餘萬石糴之是度支糴  
以六十而百姓糴以二十五農人賤糴利歸商徒度支貴  
糴賄行黔吏今請以度支貴糴錢五十萬貫送京兆府充  
百姓一年兩稅勒二十三縣代縉輸粟八十萬石小麥二  
十萬石充度支諸色軍糧則開成三年以後似每歲放百  
姓一半稅錢又省度支錢一十萬貫勸農減費物理昭然  
仍請百姓廣開田畝更不加稅行之有節富庶可期

論郭仲文不合襲封奏

開成元年  
給事中

伏準制書贈司徒郭釗嫡男仲文襲封太原郡公者臣近  
訪知郭釗妻沈氏公主之女代宗皇帝外孫有男仲辭已  
選尚主仲文不合假冒自稱嫡子若仲文承嫡卽沈氏須  
黜居別室仲辭不合配尚貴主伏以郭仲文尚父子儀之  
孫太皇太后之姪戚里勲門無與儔比婚姻嫡庶朝野具  
知奪宗之配實玷風教且仲文仲辭旣非同出襲封尚主  
不可並行伏請付臺勘當

請吏部選人頒行長榜奏

開成二年四月  
月中書門下

天下之理在能官人古人以還委重吏部自循資授任衡

鏡失權立格去留簿書得計比緣今年三月選事方畢四  
月已後方修來年格文五月頒下及到地遠已及秋期今  
請起今月與下長格所在州府榜門曉示其所資官取本  
任黃衣本貫解一千里內三月十日解到省二千里三千  
里遞加十日並勒本州賚送選人發解訖任各歸家其年  
七月十五日齊於所住府看吏部長榜定留放其得留人  
並限其年十二月十日齊到省試注唱正月內銓門開永  
爲定例如其年合用闕少選人文書無違犯可較則於本  
色闕內先集選深人年長人其餘人旣無闕可集南曹俱

爲判成榜示所住州縣府許次年取本任州府公驗便依限赴集更不重取本任本貫解

請接濟諸州閒散宗室奏

開成二年六月宗正寺

諸州府如有宗子寄寓貧病不能自濟者有羈旅道途棲遲丐食者並請所在州縣切加存卹兼隨事接借不得令有侵欺致使抑屈如有違犯禮禁自冒刑名卽任所在州縣仔細勘問仍先具罪狀申報宗正寺待寺司聞奏不得懸便科斷所冀遠方宗子平時無困辱之虞守土諸侯聖朝識敦睦之意

請於五經字樣後附九經字樣奏

開成二年八月因子監

得覆定石經字體官翰林待詔唐元度狀伏准太和七年二月五日勅覆九經字體者今所詳覆多依司業張參五經字爲准其舊字樣歲月將久畫點參差傳寫相承漸致乖誤今並依字書與較勘同商較是非取其適中纂錄爲新加九經字樣一卷請附於五經樣之末用證紕誤

請紀錄時政奏

開成三年二月中書門下

延英對宰臣須紀錄伏以陛下躬勤庶政超邁百王每對宰臣日旰忘倦正衙決事二史在前便殿坐日全無紀錄

長壽初宰臣姚璹奏置時政紀寢而不行貞元中宰臣趙  
憬請復故事無何又廢恭惟聖政必在發明今請每至延  
英坐日對宰臣往復之詞關教化政刑之事委中書門下  
直日紀錄月終送史館所冀政猷不墜國史有倫昨日延  
英面奏已蒙允許

論韋籌進書史解表奏

開成三年  
八月史館

臣等謹按春秋尚書最爲前史事言異貫義體兩存今韋  
籌所著意實卽師古欲使本朝大典與千古同風然漢氏  
已還更立史法稽其指要事歸詳盡伏以聖唐御宇向三

百年聲教遠垂文物大備祖功宗德傳諸不朽本紀實錄之外復有注記典厯蓋史氏職司大懼簡畧久已著定遽難變更臣等參酌古今須歸的當況厯代編紀名號實繁雖統制各殊悉傳示於後伏請以籌所進之書藏於史館待其著述功畢令與舊史兼行則國朝典法今古咸備

請准受代官赴闕奏

開成三年八  
月 中書門下

伏准開成元年正月一日勅諸州刺史少尹赤令並常參官等授替去任非有徵召不得到京宜委所在州府取其由歷每兩月一度申中書門下省參詳勅意以前件官到

京後未有除授旅食可矜且令在外以候遷陟訪聞遠地不諭朝旨將謂故有勅格阻其戀闕之心干進者亦以迭來守道者便成廢滯恐須釐正以徇重情其諸道州府應有前件官等得替後任赴闕廷或家在四方亦隨所便

請常參官拜掃給公券奏

開成四年二月門下省

常參官寒食拜掃今月七日延英面奏進止令准往例給公券者臣等謹檢舊案承常參官應爲私事請假外州往來給券牒伏準太和八年八月十日勅釐草應緣私事並不許給公券今臣等商量惟寒食拜掃著在令式銜恩乘

驛用表哀榮虔奉聖旨重頒新令其有拜掃不出府界假  
內往來者並不在給券限

請量留料錢奏

開成五年五月

准今年二月八日赦節文應諸色勾留官令尅下手力雜  
給等與本道州府充攝官課料無本公司起請者臣等詳檢  
諸道官員俸料不一或正官料錢絕少雜給雜料過多若  
准赦文手力紙筆並令尅下則正官勾留亦領公事所請  
俸料不如攝官旣未得中亦恐難守本公司旣無起請中書  
門下須與條流臣等商量應諸色勾留官正料及手力課

雜職課雜給雜料紙筆等錢望各委本州都計錢數每貫  
冠二百文充攝官俸料其職田祿粟米望令全還正官不  
在計入諸色錢數之限臣等又以諸州長馬本是散員判  
司簿尉或須假攝其所冠留錢望委州司酌量閒劇差署  
均融多少支給亦不要各占本色錢數及填滿關員仍令  
每至歲終分析申報戶部

許常參等官有疾得乘擔子奏

開成五年六月  
月中書門下

臺司所奏條流擔子事更須商量其常參官或諸司長史  
品秩高者有疾及筋力綿怯不能控馭望許牒臺暫乘擔

子患捐勒停其出使郎官中路遇疾令自雇夫者若所詣  
稍遠計費極多制下檢身不合貸借輕費則不濟所要無  
借則不可支持如中路遇疾者所在飛牒申奏差替去以  
此商量度爲折衷餘請依御史臺所奏

請更瀍木名奏

開成五年七月河南尹

皇城內伊洛等四水伏以伊洛四水載在典墳今人所呼  
其名甚著其第三水字御名同東周之人所以請更其名  
者遂勒所府官司錄以下參議其事今得司錄參軍韋瓊  
等狀謹按尚書周公將營洛邑卜澗水東瀍木西惟洛食

孔安國傳云初卜黎水上不吉追卜此二木之間吉伏請改第三木字爲吉字者臣竊以周居洛宅卜年惟永今改此水雅叶祥符謹具如前

禁園戶盜賣私茶奏

開成五年十月  
鹽鐵司

伏以江南百姓營生多以種茶爲業官司量事設法惟稅賣茶商人但於店鋪交關自得公私通濟今則事須私賣苟務隱欺皆是主人牙郎中裏誘引又被販茶姦黨分外勾牽所繇因此爲姦利皆追收攬擾一人犯罪數戶破殘必在屏除使安法理其園戶私賣茶犯十斤至一百斤徵

錢一百文決脊杖二十至三百斤決脊杖二十徵錢如上累犯累科三犯已後委本州上厯收管重加徭役以戒鄉間此則法不虛施人安本業既懼當辜之苦自無犯法之心條令旣行公私皆泰若州縣不加把捉縱令私賣園茶其有被人告論則又砍園失業當司察訪別具奏聞請准放私鹽例處分

禁商人盜販私茶奏

開成五年十月  
鹽鐵司

伏以興販私茶羣黨頗衆場舖人吏皆與通連舊法雖嚴終難行使須別置法以革奸徒輕重既有等差節級易爲

遵守今既特許陳首所在招收勅令已行皇恩普洽宜從  
變法使各自新若又抵違須重科斷自今後應輕行販私  
茶無得杖伴侶者從十斤至一百斤決脊杖十五其茶並  
隨身物並沒納給糾告及捕捉所繇其囚牒送本州縣置  
厯收管使別營生再犯不問多少准法處分三百斤已上  
卽是恣行兇狡不懼敗亡誘扇愚人悉皆屏絕並准法處  
分其所沒納亦如上例

請祧代宗奏

開成  
五年

謹按天子七廟祖功宗德不在其中國朝制度太廟九室

伏以太祖景皇帝受封於唐高祖太宗創業受命有功之  
主百代不遷今文宗元聖昭獻皇帝升祔有時代宗睿文  
孝武皇帝是親盡之祖理合祧遷每至禘祫合食如常

請停散試官攝州縣事奏

會昌元年五月  
中書門下

州縣攝官假名求食常懷苟且不恤疲人其州縣闕少官  
員今後望委本州刺史於當州諸縣官中量賢劇分配公  
事勾當如官員數少力實不逮處卽於前資官選擇清謹  
有能者差攝不得取散試官充

請定祀九宮儀注奏

會昌二年正月  
太常禮院

准監察御史關牒今月十三日祀九宮貴神已勅宰相崔珙攝太尉行事合受誓戒及有司徒司空否伏以前件祭本稱大祠準太和三年七月二十四日勅降爲中祠昨據勅文祇稱崇飾舊壇務於嚴潔不令別進儀注更有改移伏恐不合却用大祠禮料伏候裁旨

定宰相兩省官拜賀朝儀奏

會昌二年五月  
中書門下

元日御含元殿百官就列唯宰相及兩省官皆未開扇前立於欄檻之內及扇開便侍立於御前三朝大慶萬邦稱賀唯宰相侍臣同介胄武夫竟不拜至尊而退酌於禮意

事未得中臣等請御殿日昧爽宰相兩省官闈班於香案  
前俟扇開通事贊兩省官再拜拜訖升殿侍立

請禁伐桑奏

會昌二年五月天德軍

回紇族帳侵擾部內勅勸課種桑比有勅命如能增數每  
歲申聞比知並無遵行恣加翦伐列於廓市賣作薪蒸自  
今州縣所由切宜禁斷

請改河陽等縣爲望州縣奏

會昌三年九月中書門下

臣聞河陽五縣自艱難以後割屬河陽三城使今河南所  
管五縣中租賦色役盡屬河陽使歸一統便爲定制既是

金文卷之三  
雄鎮足壯三城臣等商量其河陽縣望改爲孟州仍爲望州河陽汜水溫縣河清濟源等五縣改爲望縣其縣令以下望且令守本官至吏部注官日替

請以罰公主封物宣付史館奏

會昌三年  
中書門下

伏聞定安大長公主二月二十五日以回紇背叛恩德侵軼邊陲於光順門內脫去簪珥變服請罪陛下釋其憲負方敢對見又以宣城公主等違勅不到各罰封物伏以禮法之行始此中壺王化盛事人倫美談周易云正家而天下定矣臣等忝在樞近不任抃賀踴躍之至伏望宣付史

館紀述爲百代典制

請禁止奸欺奏

會昌四年七月京兆府

擒盜賊并鬪行鬪毆人等被奸惡所由與府縣人吏同情欺罔因緣卜射求取恣爲不顧典刑隱藏愆犯臣見今推鞠須立條科應府縣所由輒因事取錢及恐嚇平人遺重囚典引坊市人戶推問得實贓至十貫以上者從今後伏請集衆決殺十貫以下者卽量情科斷如捕賊所由捉搦賊贓至五十貫請賞三十貫文如贓至一百貫以上取本贓一半以上充賞庶賞罰必行奸欺止息

請更定應舉保人例奏

會昌四年十月  
中書門下

朝庭設文學之科以求髦俊臺閣清選莫不絲茲近緣覈實不在於鄉間趨名頗雜於非類致有跋扈之地情計交通將澄化源在舉明憲臣等商量今日以後舉人於禮部納家狀後望依前三人自相保其衣冠則以親姻故舊久同遊處其有江湖之士則以封壤接近素所諳知者爲保如有缺孝弟之行資朋黨之勢跡繇邪徑言涉多端者並不在就仕之限如容情故自相隱蔽有人糾舉其同保人並三年不得赴舉仍委禮部明爲戒勵編入舉格

毀佛像奏

會昌五年七月  
中書門下

天下廢寺銅像鐘磬委鹽鐵使鑄錢其鐵像委本州鑄爲農器金銀鉢石等像銷付度支衣冠士庶之家所有金銀銅鐵之像勒出後限一月納官如違委鹽鐵使依禁銅法處分其土木石等像合留寺內依舊

勒令僧人還俗奏

會昌五年七月  
中書門下

僧尼不合隸祠部請隸鴻臚寺其大秦穆護等祠釋教既已釐革邪法不可獨存其人並勒還俗遞歸本貫充稅戶如外國人送還本處收管

請修繕東都太廟奏

會昌五年八  
月中書門下

東都太廟九室神主共二十六座自祿山叛後取太廟爲軍營神主棄於街巷所司潛收聚斂在太微宮內新造小屋之內其太廟屋室並在可以修崇太和中太常博士議以爲東都不合置神主車駕東幸卽載主而行至今因循尚未修建望令尚書集公卿及禮官學官詳議如不要更置須有收藏去處如合置望以所拆大寺材木修建李石旣是宗室官爲居守便望令充修東都太廟使勾當修繕

論韋宏質奏

會昌五年十  
二月宰臣

臣等昨於延英對恭聞聖旨常欲朝廷尊臣下肅此是陛下深究理本也臣按管子云凡國之重器莫重於令令重則君尊君尊則國安故國安在於尊君尊君在於行令君人之理本莫要於出令故曰虧令者死益令者死不行令者死不從令者死又曰令行於上而下論可不可是上失其威下繫於人也自太和已來其風大弊令出於上非之於下此弊不除無以理國也昨韋宏質所論宰相不合兼領錢穀臣等輒以事體陳聞昔匡衡所以云大臣者國家之股肱萬姓所瞻仰明王所慎擇傳曰下輕其上賤人圖

柄則國家搖動而人不靜宏質受人教導輒獻封章是則  
賤人圖柄矣蕭何之漢朝名儒重德爲御史大夫奏云今  
首歲日月少光罪在臣等上以望之意輕丞相乃下侍中  
御史詰問貞觀中監察御史陳師合上書云人之思慮有  
限一人不可兼總數職太宗曰此人妄有毀謗欲離間我  
君臣流師合於嶺外賈誼云人主如堂羣臣如陛陛高則  
堂高亦由將相重君臣尊其勢然也如宰相奸謀隱匿則  
人人皆得上論至於制置職業固是人主之柄非小人所  
得干議古者朝廷之上各守其官思不出位宏質賤人豈

得以非所宜言上瀆明主此是輕宰相撓時政也昔東漢處士橫議遂有黨錮事起此事深要懲絕伏望陛下詳其姦詐去其朋徒則朝廷安靜制令肅然臣等不勝感憤之至

請詳定廟制升祔奏

會昌六年五月禮儀使

武宗昭肅皇帝祔廟并合祧去舊廟等事伏以自敬宗文宗武宗兄弟相及已厯三朝昭穆之位與承前不同所可疑者其事有四一者兄弟昭穆同位不相爲後二者已祧之主復入舊廟三者廟數有限無後之主則宜出置別廟

四者兄弟既不相爲後昭爲父道穆爲子道則昭穆同班不合異位據春秋文公二年躋僖公何休云躋升也謂西上也惠公與莊公當同南面西上隱桓與閔僖當同北面西上孔穎達亦引斯義釋經又賀循云殷之盤庚不序陽甲漢之光武上繼元帝晉元帝簡文皆用此義毀之蓋以昭穆同位不可兼毀二廟故也尚書云七世之廟可以觀德且殷家兄弟相及有至四帝不及祖禰何容更言七世於理無疑矣二者今已兄弟相及同爲一代矯前之失則合復祔代宗神主於太廟或疑已祧之主不宜更入太廟

者按晉代元明之時已遷豫章潁川矣及簡文卽位乃元帝之子故復豫章潁川二神主於廟又國朝中宗已祔太廟至開元四年乃出置別廟至十年置九廟而中宗神主復祔太廟則已遷復入亦可無疑矣三者廟有定數無後之主出置別廟者按魏晉之初主多同廟蓋取上古清廟一宮尊遠神祇之義自後晉武所立之廟雖云七主而實六世蓋景文同廟故也又按魯立姜嫄文王之廟不計昭穆以尊尚功德也晉元帝上繼武帝而別享惠懷愍三帝時賀循等諸儒議以爲別立廟親遠義疎都邑遷異於理

無嫌也今以文宗棄世纔六年武宗甫爾復土遽移別廟不齒宗祖在於有司非所宜議四者添置廟之室按禮論晉太常賀循云廟以容主爲限無拘常數故晉武帝時廟有七主六代至元帝明帝廟皆十室及成康穆三帝皆至十一室自後雖遷故祔新大抵以七世爲准而不限室數伏以江左名儒通贊覩輿事有明據固可施行令若不行是議更以迭毀爲制則當上不及高曾未盡之親下有忍臣子恩義之道謹備討古今參校經史上請復代宗神主於太廟以存高曾之親下以敬宗文宗武宗同爲一代於

太廟東間添置兩室定爲九代十一室之制以全臣子思敬之義庶協大順之宜得變禮之正折古今之紛互立羣疑之杓指俾因心廣孝永燭於皇明昭德事神無虧於聖代

請定祝文稱號奏

會昌六年十月  
太常禮院

補裕祝文稱號穆宗皇帝宣懿皇后韋氏敬宗皇帝文宗皇帝武宗皇帝緣從前但序親親以穆宗皇帝室稱爲皇兄未合禮文得修撰官朱儔等狀稱禮序尊尊不敘親親陛下於穆宗敬宗武宗祝文恐須但稱嗣皇帝臣某昭告

於某宗以下四室勅旨令禮官同商量聞奏者臣與今博士閔慶之修撰官朱儕檢討官王皞同考禮經更無別議請依前狀

增諸州刺史俸料奏

會昌六年十二月  
中書門下

應諸州刺史既欲責其潔已須令俸祿稍充但以厚薄不同等級無制致使俸薄處無人願去祿厚處終日爭先應諸中下州司馬軍事俸料共不滿一百千者請添至一千其緊上州不滿一百五十千者請添至一百五十九千其雄望州不滿二百千者請添至二百千其先已過者卽得

仍舊並任於軍事雜錢中方圓置本收利充給如別帶使額者並仍舊不在添限

欽定全唐文卷九百六十八目錄

闕名九

請令婚田諸訟先陳府縣奏

交替職田合計閏月奏

請禁屠牛奏

請宣示湧泉瑞應奏

據三司推勘吳湘獄罪狀奏

請定三院御史除授月限奏

神主改題不改造奏

議罰朝參不到奏

請禁斷供應戶奏

請監決官先引問囚徒奏

請嚴禁屠牛奏

請准崔龜從立私廟奏

請依舊例放選奏

條陳考課事例奏

議平贓定估奏

請定去任官犯罪科條奏

責成諸道觀察使奏

更定科目事例奏

准勅釐革中外奏請官額奏

議免攤配逃亡戶口賦稅差科奏

請移樂人不得住祕閣奏

請以降誕日爲乾和節奏

上皇太后尊號奏

避哀帝御名奏

妖星不見奏

上積善宮名奏

請改定乳母封號奏

請修置武明王廟奏

請增貢舉額數奏

請諸道申送員闕奏

請禁夜行奏

欽定全唐文卷九百六十八

闕名九

請令婚田諸訟先陳府縣奏

大中元年四月御史臺

伏以御史臺臨制百司糾繩不法若事簡則風憲自肅事煩則綱紀轉輕至如婚田兩競息利交關凡所陳論皆合先陳府縣如屬諸軍諸使亦合於本司披論近日多便詣臺論訴煩累旣甚爲弊頗深自今已後伏請應有論理公私債負及婚田兩競且令於本司本州府論理不得卽詣臺論訴如有先進狀及接宰相下狀送到臺司勘當審知

先未經本司論理者亦且請送本司如已經本司論理不平卽任經臺司論訴臺司推勘冤屈不虛其本司本州元推官典並請追赴臺推勘量事情輕重科斷本推官若罪輕卽罰直書下考稍重卽停任貶降以此懲責庶免曠官臣今月三日已於延英面奏令臣將狀來

交替職田合計閏月奏

大中元年  
十月屯田

應內外官請職田陸田限三月三十日水田限四月三十日麥田限九月三十日已前上者入後人已後上者入前人伏以令式之中並不該閏月每遇閏月交替者卽公牒

紛紜有司既無定條莫知所守伏以公田給使須准期程  
時限未明實恐遺闕今請至前件月遇閏卽以十五日爲  
定式十五日前上者入後人已後上者入前人據今條  
其元闕職田並限六月三十日春麥限三月三十日宿麥  
限十二月三十日已前上者入新人已後上者並入舊人  
今亦請至前件月遇閏卽以十五日爲定式所冀給受有  
制永無訴論

請禁屠牛奏

大中二年  
二月刑部

牛者稼穡之資邦家所重雖加條約多有違犯今後請委

州府縣令並錄事參軍嚴加捉搦如有牛主自殺及盜竊殺者卽請准乾元元年二月五日勅先決六十然後准法科罪其本界官吏嚴加止絕

請宣示湧泉瑞應奏

大中二年十一  
月中書門下

右伏以川竭旣爲時否泉生必表政成況近靈祠實彰聖德因風湧出當風化之所資徧地澄清誠地經之載理近者柏樹復榮於李觀蒙泉亦發於神州考其祥經皆合理代臣等商量望付史館書爲國華謹具如前

據三司推勘吳湘獄罪狀奏

大中三年十一  
一月御史臺

揚州都虞候盧行立劉羣於會昌二年五月十四日于阿  
顏家喫酒與阿顏母阿焦同坐羣自擬收阿顏爲妻妾稱  
監軍使處分要阿顏進奉不得嫁人兼擅令人監守其阿  
焦遂與江都縣尉吳湘密約嫁阿顏與湘劉羣與押軍牙  
官李克勳卽時遮攔不得乃令江都百姓論湘取受節使  
李紳追湘下獄計贓處死具獄奏聞朝廷疑其寃差御史  
崔元藻往揚州按問據湘雖有取受罪不至死李德裕黨  
附李紳乃貶元藻嶺南取淮南元申文案斷湘處死今據  
三司使追崔元藻及淮南元推判官魏鋗並關連人款狀

淮南都虞候劉羣元推判官魏鋗典孫貞高利錢倚黃嵩  
江都縣典沈頴臣宰節度押牙白涉鎮遏使傅義左都虞  
候盧行立天長縣令張宏思典張洙清陳迴右廂子巡李  
行璠典臣金宏舉送吳湘妻女至澧州取受錢物人潘宰  
前揚府錄事參軍李公佐元推官元壽吳珙翁恭太子少  
保分司李德裕西川節度使李回桂管觀察使鄭亞等伏  
候勅旨

請定三院御史除授月限奏

大中三年十一月御史臺

應三院御史新除授月限伏以當司官三十餘員朝廷舊

例月限守官年勞考績今監察御史以二十五月爲限殿中侍御史十八月侍御史十三月所主公事起自出使推劾諸色監當經歷六察糾繩官司知左右巡使監臨倉庫四推鞫獄兩彈舉事皆無敗闕方得轉遷承前遠地除官或三月五月然始到京所務逗遛積延時月年終考課使繫虛月官事勞苦併在舊人侍御史周歲而遷或到城欲及滿歲監察二年爲限或在外有至半年致此依違曾無督責臣請自今已後應當司官除新授者並請以上後繫月仍以上日在後者爲新人不更數虛月不惟分月直之

勞苦抑亦促遠來之道途又三館奏請御史充職等伏以臺司三院御史職在專臨如繫他曹必有所紊況推鞠公事察視百司無不急急以副期限倘或官留此地志在異銜固非便宜實亦乖當如書府或須奏請南宮可輟郎官兩館忽將闕入北省自有遺補事理至便兼不曠官伏乞聖慈察臣當司公事繫重特勅中書門下自此更不許三館奏取御史充職兼見有者亦乞落職放還

神主改題不改造奏

大中三年十二月 中書門下

改題改造並無所據酌情順理題則爲宜况今士族之家

通行此例雖尊卑有異而情理則同望就神主改題則爲  
通允

議罰朝參不到奏大中四年二月御史臺

應文武常參官本朝及入閣進朝不到并連請假故久闕  
朝參等臣本月二十一日延英面奏進止以班行務在嚴  
肅令臣切加提舉者臣伏見元和元年御史中丞武元衡  
奏止於是吏部兵部禮部三司尚書侍郎郎官等選舉限  
內久廢朝參雖事在奉公猶奏請釐革近者已久絕提舉  
稍涉因循應文武常參官多妄請假不妨人事無廢宴遊

但務便安有虧誠敬以至上勞聖念俾肅朝行臣忝憲司  
親承睿旨苟或避事實虞曠官臣請起自今已後文武常  
參官等除准式假及病灼然爲衆所知外有以事故請假  
者並望許臣舉察錄奏其所陳假牒請准舊例每牒不得  
過三日每月不得再陳牒如本合朝日無故一不到請准  
常條書罰再不到臣請倍罰頻三朝不到便請具名銜奏  
聽進止其進朝入閣近例全合赴班一不到准條已倍書  
罰頻兩朝不到便請具銜奏聞所冀臣寮稍加惕厲班列  
得以整齊

請禁斷供應戶奏

大中四年五月御史臺

所在物產自有時價官人買賣合准時宜近日相承皆置供應戶既資影庇多是富豪州縣科差盡歸貧下不均害理爲弊頗深自此已後委觀察使嚴加覺察宜並禁斷切慮諸道州府尚有此色請各牒諸州府勘會巨細申臺以憑鞫理

請監決官先引問囚徒奏

大中四年九月御史臺

准舊例京兆府准勅科決囚徒合差監察御史一人到府門監決御史未至其囚已引至科決處縱有冤屈披訴不

及今後請許令御史先到引問如囚不稱寃然後行決其河南府准此諸州府有死囚仍委長官差官監決並先引問

請嚴禁屠牛奏

大中五年正月  
中書門下

屠牛之禁格令至重此立條流必令禁斷臣等商量應天下諸州府如有牛死便於所在經官陳狀勘驗無他故然後始令就市解剝貨賣不得更將歸私家如有屠牛事發不惟本主抵法鄰里保社並須痛加懲責本縣官吏委刺史節級科罰仍委諸道觀察使各逐所管州縣穩便更別

立條制須極嚴峻務令止絕其行營處亦准此禁斷

請准崔龜從立私廟奏

大中五年四月太常禮院

據中書侍郎兼吏部尚書平章事崔龜從奏臣官准式合立私廟伏准會昌五年二月一日勅旨百官並不得京城內置廟如欲於京城內置廟者但准古禮於所居處置卽不敬親之禮者伏以武宗時緣南郊行事見天門街左右諸坊有人家私廟遂令禁斷但本不欲令御路左右有廟宇許令私第內置則近北諸坊漸逼宮闈十年之內悉是人家私廟今若人家居第廣寬或鄰里可兼并者必便

置廟以展孝思或居處褊狹鄰近無可開廣者便是終身  
廢廟享之榮公私情禮皆極不便國朝二百餘年在私家  
側近者不過三數家今古殊禮頗爲敷贊其餘悉在近南  
遠坊通行已久今若緣南路不欲令置私廟却令居處建  
立廟宇卽須種植松柏及白楊樹近北諸坊竊恐非便以  
臣愚見天門街左右諸坊不許置廟其餘圍外遠坊本是  
隙地并舊是廢廟者許令建立則天門街側近旣無私廟  
近北諸坊又免百官占地立廟并官至三品盡得升祔祖  
禰無乖禮經中外官寮已至三品者皆望有此釐革伏請

下太常禮院重定立廟制度及去處庶得祀禮可遵行事  
無乖當奉今月一日勅宜依所奏下太常禮院詳審制度  
分析奏聞伏以事亡如存典禮攸重今百官悉在京師若  
不許於京內置廟則烝嘗之禮難復躬親孝思之心或乖  
薦奠若悉令於居處置廟又緣近北諸坊便於朝謁百官  
第宅布列坊中其間雜以居民棟宇悉皆連接令廣開則  
鄰無隙地廢廟貌則禮闈敬親若依令會昌五年勅文盡  
勒於所居置廟兼恐十數年間私廟漸逼於宮牆齊民必  
欲於吞併臣具詳本末冀便公私今請夾天門街左右諸

坊不得立私廟其餘圍外遠坊任取舊廟及擇空閑地建立廟宇應立廟之初先取禮司詳定策請准開元禮二品以上祠四廟三品祠三廟三品以上不須爵者四廟外有始封祖通祠五廟三品以上不得過九架並廈兩頭其三室廟制合造五間其中三間隔爲三室兩頭各廈一間虛之前後亦虛之每室中西壁三分之一近南去地四尺開一堵室以石爲之可容兩神主廟垣合開南門東門並有門屋餘並准開元禮及曲臺禮爲定制其享獻之禮除依古禮用少牢特牲饋食外有設時新及今時熟饌者並聽

仍請永爲定式

請依舊例放選奏

大中五年十月  
書門下

應赴兵部武選門官驅使官等今年新格令守選二年得驅使官盧華等狀稱各在省驅使實緣長官辛苦事力不濟所以假此武官若廢舊格貧寒不逮卽須漸請停解公事交見廢闕

條陳考課事例奏

大中六年七月考功

近年諸州府及百司官長所書考第寮屬並不得知昇黜之間莫辨當否自今以後書考後但請勒各牒於本司本

州懸於本司本州之門三日其外縣官則當日下縣如有  
昇黜不當便任敷陳其考第須便改正然後申省如勘覆  
之後事無乖謬則論告之人亦必懲殿又准考課令凡官  
人申考狀不得過兩紙刺史縣令至於賦稅畢集判斷不  
滯戶口無逃散田畝守常額差科均平解字修飾館驛如  
法道路開通如此之類皆是尋常職分不合計課自今以  
後但云所勾當常行公事並無敗闕卽得准職分無失及  
開田招戶辦獄雪冤及新制置之事則任錄其事繇申上  
亦須簡要不得繁多又近年以來刺史皆自錄課績申省

矜銜者則張皇其事謙退者則緘默不言自今以後其巡  
內刺史請並委本道觀察使定其考第然後錄申本州不  
得自錄課績申省又州府申官人覆得寃獄書殊考者其  
元推官人多不懲殿或云書下考至時又不提舉請自今  
以後書辨獄官人殊考日便須書元推官下考如元推官  
自以爲屈任經廉使及臺省陳論其官人先有殿犯官長  
斷云至書考日與下考者如至時不舉其本州判官當書  
下考其所申到下考省司較其所犯如與令式相符便較  
定申奏至勅下後並須各牒州府又近日諸州府所申令

錄課績至兩考三考以後並須重具從前功課申省以冀褒昇省司或簡勘不精便可僥倖自今以後不得輒更具從前功績申上又近日諸州府所申考解皆不指言善最或漫稱考秩或廣說門資既恥令文實爲繁弊自今以後如有此色並請准令降其考第又准考課令在中上以上每進一等加祿一季中中者守本祿中下以上每退一等奪祿一季准令以此懲勸事在必行近年以來與奪幾廢或有申請之處則言無本色可支徒挂簿書竟無給與今案倉庫令支給糧祿皆以當處正倉充無倉之處則申省

隨近有處支給又無者聽以稅物及和糴屯收等物充令  
式昭然不合驟廢自今以後每省司較考畢符牒到州後  
仰當時便具昇降與奪事繇申請如違令式不舉明者其  
所繇官請奪俸祿一季其已去任官追奪祿事並請准令  
式處分又准考課令官人因加戶口及勸田農並緣餘功  
進考者於後事若不實縱經恩宥其考皆從追改追改之  
事近皆不行自今以後並請准令式處分其因此得官者  
仍請追奪又諸道所申考解從前十月二十五日到都省  
都省開拆郎官押尾後至十一月末方到本司開拆多時

情故可見自今以後伏請准南曹及禮部舉選解例直送當司開拆又從前以來應得考之人並給考牒以爲憑據近年考使容易給牒不一或一人考牒數處請給或數年之後方始請來自今以後較考勅下其得殊考及上考人省司便據人數一時與修寫考牒請准吏部告身及禮部春官牒每人各出錢收贖其得殊考者出一千文上考者出五百文其錢便充寫考牒紙筆雜用以前件事條等或出於今文或附以近勅酌情揣事不至乖張謹並條例進上伏乞宣付中書門下請更參詳苟裨至公乞賜收采仍

請三年一度准舉選格例修定頒下

議平贓定估奏

大中六年十月  
月中書門下

准勅應犯贓人宜平贓定估等奉聞七月三日勅旨刑部奏頗叶中道宜依仍編入令格者臣等今商量伏以京邑元無土絹市中所貨皆是外州縣將到若據律取當處絹價定贓平估卽京師當處之絹若取河南一千一百絹價卽見在市肆又無此實估將行新勅須立定規今京中市肆所貨諸府絹估各有等差但據罪人所犯贓如是見在絹及金銀雜物等一事已上並請取京時價估定如結贓

卽在京諸府土絹上價實估結計如罪人所取已費使及  
不記得當時州土色目卽請便取雜州土絹市肆所貨實  
價中估平結計賊准前取諸州府土絹上估實價定罪伏  
以京中諸州府絹價逐旬移改貴賤不定前使推獄每度  
臨時估定賊絹卽罪人性命所繫秒忽狡吏因茲得以上  
下令責兩市絹牙人俟建武等狀京城元不出土絹所貨  
者諸州土絹果閩州絹最貴每匹九百五十文上至五十  
尺下至四十五尺其次宋亳州土絹估每匹九百文實估  
價其河南土絹價亦無一千實估今以果閩州絹尺每與

尋常絹不同已次校貴於宋亳州上絹伏請永爲定例其  
外州府比者雖准律文取當處上估絹或有不出土絹縱  
有出處亦慮結獄之時須有勘估因其貴賤便生異端兼  
以諸州府絹價除果闡州絹外別無貴於宋亳州上估絹  
者則外州府不計有土絹及無土絹處並請一例取宋毫  
州土絹估每匹九百文結計如所取得絹已費使及不記  
得色目卽請取犯處市肆見貨當取中估絹價平之如不  
出絹處亦請以當處見貨雜州中估價平之庶使推劾有  
准斷讞無疑官吏旣難舞文中外自須畫一

請定去任官犯罪科條奏

大中六年十二月  
中書門下

准名例律在官犯罪去官事發或事發去官犯公罪流已下各勿論疏云謂在本任犯罪去官事發或事發去官者謂事發未給斷問便卽去任職此三事犯公罪流已下勿論又准會昌五年正月三日勅文據律文已去任者公罪流已下勿論公罪之條情有輕重苟涉欺詐豈得勿論向後公罪有情狀難恕並不在勿論之限今伏詳勿論之理者實啟倅門勅律所標科條未具伏見近日已來頗有長吏在官無政被人告論醜迹已達於聖聰苛政又布於人

口降制使案劾並已伏愆下法司參詳卽云去任縱有重  
罪盡得勿論此乃徒致推窮何懲奸濫且當官犯罪事迹  
已彰旣令推勘自合停替前同去任實有等差伏請自今  
已後應在官犯罪事發因而去任不論公罪私罪一切准  
勅律科刑不在勿論之限其去任事發者公罪流已下卽  
望許引勿論之科其有事涉欺詐情理難恕者請法司詳  
斷之時審詳事狀如涉此色准會昌元年正月三日勅文  
並不在勿論之限

責成諸道觀察使奏

大中六年十二月  
閏名  
中書門下

諸道觀察使職當廉問位在藩隅受人主之寵榮同國家  
之休戚不可自恃富貴惟貪優游羅聲色以自娛顧凋殘  
而不問縱逃顯責必受陰誅自今請責其成效專彼事權  
使得展意盡心恢張皇化敬事以守法度節用以減征徭  
有利於國者必行不以近名爲利有害於人者必去不以  
循例爲辭絕連夜之酣歌務盡忠之讜論常准此道方免  
曠官其巡屬州縣須知善惡具以上聞隱而不言罪歸廉  
帥應有論薦須是直書強能立事者上陳不得蔽善懦弱  
失職者奏免非可徇情如此則遠近相臨上下相制共爲

致理同歸至公

更定科目事例奏

大中十年五月  
月中書門下

據禮部貢院見置科目內開元禮三禮三傳三史學究道舉明算明法童子等九科近年取人頗濫曾無實藝可採徒添入仕之門須議條流俾精事業臣等已於延英面論伏奉聖旨將文字來者其前件九科臣等商量望起大中十年權停三年滿後至時赴試者令有司據所舉人先進名令中書舍人重覆問過如有本業精通堪備朝廷顧問卽作等第進名候勅處分如事業荒蕪不合送名數者考

官當議朝責其童子近日諸道所薦送者多年齒已過僞稱童子考其所業又是常流起今已後望令天下州府薦送童子並須實年十一十二以下仍須精熟一經問皆全通兼自能書寫者如違制條本道長吏亦議懲罰

准勅釐革中外奏請官額奏

咸通十二年七月  
中書門下

准今年六月十二日勅釐革諸道及在京諸司奏官并請章服事者其諸道泰州縣官司錄錄事參軍或見任公事敗闕不理切要替換及前任實有勞効且見有關員卽任各舉所知每道奏請仍不得過兩人其河東潞府邠寧涇

原靈武鹽夏振武天德鄜坊滄德易定三川等道觀察防禦等使及嶺南五管每道每年除令錄外許量奏簿尉及中下州判司及縣丞共三人偏州不在奏州縣官限其黔中所奏州縣官及大將管內卽任准舊例處分在京諸司及諸道帶職奏官或非時充替考限未滿並却與本資官諸道節度及都團練防禦使下將較奏轉試官及憲御等令諸節度使每年量許五人都團練防禦量許三人爲定不得更於其外奏請其御史中丞已下卽准勅文條流須有軍功方可授任自今後如顯立戰伐功勞者任具事績

申奏如簡勘不虛當別具商量處分以外輒不得更有奏請其幽鎮魏三道望且准承前舊例處分

議免攤配逃亡戶口賦稅差科奏

咸通十三年六月 中書門下

今月十七日延英面奉聖旨令誠約天下州府應有逃亡戶口其賦稅差科不得攤配見在人戶上者伏以諸道州府或兵戈之後災沴之餘戶口逃亡田疇荒廢天不敷佑人多艱危鄉閭屢困於征徭帑藏因茲而耗竭遂使從來經費色額大半空系簿書緩征斂則闕於供須促期限則迫於貧苦言念凋弊勞乃憂勤不降明文孰知聖念其逃

亡戶口賦稅及雜差科等須有承佃戶人方可依前應役  
如將闕稅課額攤於見在人戶則轉成逋債重困黎元或  
富者有連阡之田貧者無立錐之地欲令均一固在公平  
若令狡猾之徒得以升降由已望其完葺不亦難乎全由  
長吏竭誠方使疲甿漸泰臣等商量令諸道州府準此條  
流應有逃亡戶口稅賦并雜色差科等並不得輒更攤配  
於見存人戶之上務設法招攜多方撫御乘茲豐稔重獲  
昭蘇苟致安寧自當遷陟不遵詔令必舉典刑

請移樂人不得住祕閣奏

龍紀元年  
祕書省

當省元掌四部御書十二庫共七萬餘卷廣明之亂一時  
散失後來省司購募尚及二萬餘卷及先朝再幸山南尚  
存一萬八千卷竊知京城制置使孫惟晟收在本軍其御  
書祕閣見充教坊及諸軍人占住伏以典籍國之大經祕  
府校讐之地其書籍並望付當省校其殘缺漸令補輯樂  
人乞移他所

請以降誕日爲乾和節奏

天祐元年八月  
月中書門下

皇帝九月三日降誕伏以電曜繞樞軒頃乃降天之日光  
輝照室明元寶命代之辰爰自我朝乃崇令節著爲故事

抑播前文伏惟皇帝陛下九五飛龍四三應運國稱利見  
天表殊休當誕聖之時感真人以衛室居在藩之際寶羽  
客以獻符是以克紹丕圖光膺寶祚敢循故典爰定美文  
臣等商量以降誕日爲乾和節易曰乾健也蓋乾以自強  
不息和則衆彙皆同遠徵易文實諧聖德請依令式休假  
獻賀

上皇太后尊號奏

天祐元年九月  
中書門下

伏以陛下光繼寶圖纂承丕緒教道克申於先訓保任實  
自於慈顏今則正位宸居未崇徽號伏以大行皇帝皇后

母臨四海德冠六宮推尊宜正於鴻名敬上式光於睿孝  
望上尊號曰皇太后

避哀帝御名奏

天祐元年  
中書門下

臣等謹按故事漢室以北山改郡蓋爲文皇國朝以復姓  
稱子實緣憲祖或易建康之縣或更昭穆之音皆因踐祚  
之初合舉避行之典按爾雅釋樂篇鼓謂之止敔謂之鎸  
今者陛下肇承丕祚始值遷都凡厥惟新式叶正始竊詳  
爾雅肇亦訓始臣等商量望改爲肇

妖星不見奏

天祐二年五月司天臺五

旬朔已前星文變見仰觀垂象時軫聖慈自今月八日夜  
已後連遇陰雨測候不得至十三日夜一更三點天色暫  
晴景緯分明妖星不見於碧虛災沴潛消於天漢者

上積善宮名奏

天祐二年五月  
月中書門下

皇太后慈惠臨人寬仁馭物早叶倪天之兆克彰誕聖之  
符今輪奐新宮規模舊典崇訓旣徵於信史積善宜顯於  
昌期太后宮請以積善爲名

請改定乳母封號奏

天祐二年九月  
月中書門下

伏以妣婆楊氏等保持夙宵善養勞苦且隆恩澤以報勤

劬竊以事體參詳合陳管見臣聞周制宮職夫人只列三人漢氏後宮之號十有四位元帝時置昭儀位視丞相秩比諸侯王至於列妾縱稱夫人亦無裂土割郡之號以乳母郭徵卿胡維著保養宣帝之功後子孫只受厚賞而無封爵之號且帝外祖母封博平君非乳母之例後漢順帝封阿母宋氏爲山陽君則致漢陽地震安帝時封乳母王氏爲野王君亦致地震京師其時中正上言亦以封爵過當乃貽厥咎非叶高祖山河之約至晉室中興乳母阿蘇有保元帝之功賜號保帝聖君既非爵邑又彰其功爰擇

美名在理甚當至高齊陸令壹以乾阿姊授封郡君尋亂  
制度中宗神龍元年封乳母于氏爲平恩郡夫人景龍四  
年封尚食高氏爲脩國夫人封爵之失始自於此後睿宗  
下詔封元宗乳母莫氏爲夫人竊以中宗朝政歸韋氏睿  
宗朝駕躡軒轅當時無復紀綱歷載寢爲訛弊伏以陛下  
重興寶運再闡不圖奉高祖太宗之舊行往代前賢故事  
克臻至道以顯中興庶彙提綱衆務畢舉今者進封保母  
爲郡夫人再至加恩須至封國夫人竊以婦人無爵從夫  
之爵以賞功勲則命爵又四方多事方注意公卿以勲勞

昭著者室家爵邑自郡夫人今則宣授乳母爲郡夫人加恩必及列土朝廷大柄以爵祿爲主命爵不定其等差則天下之人無以爲貴以爲貴功則封比礪山榮室則爵同乳母臣等竊意有室家者實恥之況四海九州之內有功勞安社稷勲賢得不對室家慚於所命之爵其所封乳母楊氏王氏臣等參詳望賜釐革雖居溼推燥畢彰保養之勤但胙土分茅且異疏封之例況昭儀內侍燕寢位列宮嬪夫人則亞列妃嬪供奉左右竊按儀禮乳母總以其名母方有總服今則不可以嬪御之號增榮於阿保揆於禮

文有乖事體宜加眷佑當樹鴻私永示規程以服寰宇臣等商量妣婆楊氏望賜號安聖君妣婆王氏望賜號福聖君第二妣婆王氏望賜號康聖君

請修置武明王廟奏

天祐二年九月  
中書門下

伏自遷都以來武成王廟並未置立今請改爲武明王避朱父諱其廟請於街西選地建立其餘修置及配享十哲七十二弟子並請准故事者

請增貢舉額數奏

天祐三年二月禮部

伏以朝廷累年多事道途艱辛在遠舉人併阻隨計逐年

所司放榜人數不常量其少多臨事增減今者干戈稍弭水陸漸通舉人等皆負笈擔簷裂裳裹足來求試藝競切觀光雖人數不廣於近年而貢籍頗甚其屈譽至於俊造亦有其人臣今欲於去年數外更放三數人佇開勸誘之門以贊文明之運已選今年二十一日放榜伏候進止

請諸道申送貢闈奏

天祐三年四月吏部

比者格式申送員闕選人多有重疊皆是兩人同到本道致使磨勘之際各有爭論蓋是選人指闕之時妄稱事故銓司無因得知具狀須與注擬如到任替闕參差請准舊

條殿選除此外如是格式申送員闕仰且穩便去處請官不得更妄指射諸道假滿拋官不到任不放上停官不赴任員闕及違程不及限等員闕冀其盡一免誤銓司公事者

請禁夜行奏

天祐三年閏十二月皇城使

伏以皇城之內咫尺禁闈晨夜巡警固須清肅伏乞准勅條漏鼓聲絕後禁斷人行今據軍人百姓更點動後尚恣夜行特乞聖慈再下六軍止絕